

АКАФИСТ СВЯТЫМ МУЧЕНИКАМ ФЛОРУ И ЛАВРУ

Кондак 1

Избранную двоицу пресветлую, Христу спострадавшую даже до крове, Флора преблаженнаго и Лавра всечестнаго, в песнях, вернии, почтим духовных и, яко молитвами сих от бед избавляеми, благодарственно вопием, зовуще: Радуйтесь, Флоре и Лавре, рая Христова цветы прекраснии.

Икос 1

Ангельстии чини яко сликовники прияша вы, блаженнии мученицы, егда по страдании своем Престолу Господню предстаете, во еже со всеми, кровию Агнца Божия запечатленными, взывати “Осанна!” Седящему на Престоле. Мы же, бреннии, на земли, о таковой славе вашей дивящися, восхваляем вы сице: Радуйтесь, Христу последовавшии верою; радуйтесь, крест Его, яко ярем, взявшии. Радуйтесь, кровию Агнца Божия искупленнии; радуйтесь, и своя крове Христа ради не пощадевшии. Радуйтесь, смертию красною Христови спогребшиися; радуйтесь, жизни источник обретшии. Радуйтесь, путь узкий, прискорбный прошедшии; радуйтесь, яко отверзошася вам райския двери. Радуйтесь, Флоре и Лавре, рая Христова цветы прекраснии.

Кондак 2

Видяще, яко многа мзда на небесех дана святым страсготерпцем, потщимся, вернии, тех житие земное прилежно разсмотревше, от сего научитися, колико может вера, деяньми споспешествуема, како воздвизает от земных к небесным и како научает взывати Богу: Аллилуиа.

Икос 2

Разум Божественный озари вы, Флоре и Лавре, егда благочестия хранители Прокл и Максим не токмо каменосечней хитрости вы научиша, но и на камени веры Христовой добре утвердиша, на немже несокрушими даже до конца пребысте, трудолюбно Господеви работающе, сего ради ублажаем вы, зовуще: Радуйтесь, в трудех от юности воспитаннии; радуйтесь, Христу себе поработившии. Радуйтесь, леность далече отгнавшии; радуйтесь, данный вам талант много усугубившии. Радуйтесь, рабства плоти избегшии; радуйтесь, духом Господеви работавшии. Радуйтесь, трудолюбцев удобрение; радуйтесь, ленивых укорение. Радуйтесь, Флоре и Лавре, рая Христова цветы прекраснии.

Кондак 3

Сила Вышняго подвиже правителя страны некия призвати делателей святых ко устроению храма идольскаго, капищу бо сему сооружаему бывшу, иный храм нерукотворенный созидашеся; людие страны тоя, Флора и Лавра проповедию наученнии, Истиннаго Бога познаша и Тому Единому пети навывоша: Аллилуиа.

Икос 3

Имуще твердую веру в сердцах своих, небоязненно отыдоша богоноснии братия во ину страну на делание чуждое, и, по мале времени, в труд апостолов обратися делание их; людие, во тме и сени смертной сидящии, светом Евангелия озаришася, еже каменосечцы богомудрии с собою принесоша, сего ради воспоем сих, зовуще: Радуйтесь, языков просветители; радуйтесь, апостолов подражатели. Радуйтесь, Евангелия Христова провозвестницы; радуйтесь, на ниве неоранней Господни работницы. Радуйтесь, в людех тяжцех Господа восхвалившии; радуйтесь, во языцех славу Его возвестившии. Радуйтесь, Церкви прекрасное прозябение; радуйтесь, небесных садов леторасленное украшение. Радуйтесь, Флоре и Лавре, рая Христова цветы прекраснии.

Кондак 4

Бурю злобы неистовья воздвиже на вы Мемертин, идольский жрец, егда сыну его, на делание ваше неопасно взиравшу, око каменцем, внезапно отторгшимся, избодеся, и хулы многи отрыгаху на вы, делателие незлобивии, уста еще не ведевшего пети: Аллилуиа.

Икос 4

Слышавше хуления многа и пристрашия свирепа Мемертина озлобленнаго, без страха прияша сия кротце Флор же и Лавр и, сострадания исполнени бывше, велие дерзновение веры проявиша, егда отрока урана целая и здрава отцу предпоставити обещаша; мы же, таковой вере, кротости и упованию святых дивящеся, воспоем им тако: Радуйтесь, равноангельныя кротости воплощение; радуйтесь, велия веры исправление. Радуйтесь, злословящаго вы благословившии; радуйтесь, кленящему вас благотворившии. Радуйтесь, на Бога, Помощника и Защитника, уповавшии; радуйтесь, прибежище и утверждение в Бозе полагавшии. Радуйтесь, в незлобии пред Господем ходившии; радуйтесь, во уповании на Него николиже изнемогшии. Радуйтесь, Флоре и Лавре, рая Христова цветы прекраснии.

Кондак 5

Боготечныя звезды явистеся, святии, юноше тому, емуже уломком камене око плотское избодено бысть; вас бо держайся, не токмо от раны исцеле, но и

очесы духовными прозре, проповеданием вашим научен, Истинного Бога позна и Тому в радости возопи: Аллилуиа.

Икос 5

Видя чудо велие, в сыне явленное, и отец его Мемертин ему споследова, идольскую прелесть отверг, Бога Истинна, яко же и сын, позна и по исповедании добрем двоице преславных мученик спострада, юже и мы ныне воспеваем, зовуще: Радуйтесь, чудотворцы предивнии; радуйтесь, врачеве духовнии. Радуйтесь, идольскую прелесть чудесы ниспровергшии; радуйтесь, неразумных души светом веры озарившии. Радуйтесь, идольскаго жреца от идолобесия отвратившии и Христу сочетавшии; радуйтесь, и сына его из вражеских сетей извлекшии. Радуйтесь, демонов огорчение; радуйтесь, Ангелов радование. Радуйтесь, Флоре и Лавре, рая Христова цветы прекраснии.

Кондак 6

Проповедницы любве истинныя явишася святии мученицы, егда при делании своем цену, за труд вземлемую, нищим раздаваху и, алчущих довольно питающе, сами в посте и лишении не сетующе пребываху, бодрственне воспеваяще Богу: Аллилуиа.

Икос 6

Возсия свет неизреченныя славы небесныя и озари храм, руками Флора и Лавра созданный, и не яко идолов вместилище, но во славу Имени Иисуса Христа освященный, людие же, свет той видевшие, вся кумиры идольския, для храма того уготованныя, сокрушше, храмоздателем взываху сице: Радуйтесь, светом богоразумия нас озарившии; радуйтесь, мрак идолослужения разсеявшии. Радуйтесь, от обдержания прелести ны свободившии; радуйтесь, путь жизни истинныя нам показавшии. Радуйтесь, яко благоухания честнаго Церковь исполните; радуйтесь, яко злосмрадие вражие далече отгнасте. Радуйтесь, бесов дерзновенное поражение; радуйтесь, Богу красное присвоение. Радуйтесь, Флоре и Лавре, рая Христова цветы прекраснии.

Кондак 7

Хотящим братьям святым по скончании делания, на неже звани быша, мирно во своя отыти, возбрани им работодателя жестокий; связав бо их и бив, яко злодеи к правителю Ликиону отведе, зане Христа яко Бога исповедаху и люди научиша зватьи Ему: Аллилуиа.

Икос 7

Новая и лютая мучения уготова вам, страстотерпцы святии, правитель, егда возвратистесь связаннии и раны за Христа приемшии во страну свою, твердости же веры вашей отнюд не поколеба, мы же, терпение ваше ублажающе, зываем

к вам сице: Радуйтесь, Христови спотерпевшии; радуйтесь, с Ним и воцарившиися. Радуйтесь, в терпении души ваша стяжавшии; радуйтесь, обетование, еже на небесех, приимшии. Радуйтесь, на Начальника веры и Совершителя, Господа Иисуса взиравшии; радуйтесь, на предлежавший вам подвиг добре востекшии. Радуйтесь, малодушных ободрение; радуйтесь, страждущих утешение. Радуйтесь, Флоре и Лавре, рая Христова цветы прекраснии.

Кондак 8

Странную и ужасную смерть изобрете людское жестокосердие кротчайшим братьям Флору и Лавру: в кладенец бо безводный ввержени и землю в нем посыпани быша; тако мняху нечестивии заглушити святых глас, к Богу вопиющих: Аллилуиа.

Икос 8

Весь мир не бе достоин вас, мученицы святии: вы бо, на земли себе места не обретше, в небесная преселившеся и яко истиннии граждане тамо отечествие снискавше, непрестанными благохвалениями Царю своему и Господу служите, восхвалим убо и мы сих богохвалющих похвалении сицевыми: Радуйтесь, о земных небрегшии; радуйтесь, на небесная ум свой вперившии. Радуйтесь, ночь жития земнаго добре прешедшии; радуйтесь, дне невечерняго — Царства Христова достигшии. Радуйтесь, яко злато, в горниле мучений искушеннии; радуйтесь, яко всеплодие жертвенное Богом приятии. Радуйтесь, пред лицом человеческим муки приявшии; радуйтесь, яко упование ваше безсмертия исполнено. Радуйтесь, Флоре и Лавре, рая Христова цветы прекраснии.

Кондак 9

“Всяк, иже исповесть Мя пред человеки, исповем его и Аз пред Отцем Моим”, — рече Господь; по Господню сему словеси и вы, страсотерпцы Флоре и Лавре, яко доблии Христови исповедницы, пред Отцем Небесным прославлени есте и со всеми святыми выну зовете Святей Троице: Аллилуиа.

Икос 9

Витийство мира сего не может изрещи величие подвига страсотерпцев святых, яко же и премудрость века сего слова крестнаго вместити никакоже может; мы же, смиреннии, буйством проповеди о Распятом спасаеми, Флора и Лавра, яко себе самех отвергшихся и души своя Христа ради отщетивших, несумненно прославляем, зовуще к ним тако: Радуйтесь, Христа пред человеки исповедавшии; радуйтесь, яко и Сам Господь исповесть вы пред Ангелы Божии. Радуйтесь, страсти Господа Иисуса Христа не усты-девшиися; радуйтесь, ради благовестия Христова пострадавшии. Радуйтесь, яко подвиг крепок подаде вам Господь; радуйтесь, яко и разум свят дадеся вам от Вышняго. Радуйтесь, яко искры по стеблю на небо востекшии; радуйтесь, во время посещения вашего добре возсиявшии. Радуйтесь, Флоре и Лавре, рая Христова цветы прекраснии.

Кондак 10

Спасению нашему ходатаи молим вас быти, святии мученицы, добре страдавшии и венчавшиесе, и того ради благодать приимшии; о нас молитесь, да, избавльшесе от суетныя работы вражия, благодарственно вопием Богу: Аллилуиа.

Икос 10

Стен каменных здатели иногда бывше, веры же твердостью, многоразличных мук и лютыя смерти за Христа претерпением велие дерзновение у Него снискавше, молятся ныне о чтущих память их верно, и в бедах многоразличных и напастех осеняют надежно поющих им сице: Радуйтесь, Церкви Христовы столпи непоколебимии; радуйтесь, веры христианския ограждение твердое. Радуйтесь, в вере колеблемым утверждение крепкое; радуйтесь, в мори напастей гибнущим пристанище надежное. Радуйтесь, фиали златии, фимиама молитв исполненнии; радуйтесь, смрадные страсти далече от нас прогоняющи. Радуйтесь, теплии к Богу молитвенницы; радуйтесь, преистиннии ходатаи. Радуйтесь, Флоре и Лавре, рая Христова цветы прекраснии.

Кондак 11

Пение неумолчно и лики светлы исполниша Царский град, егда по обретеннии принесени и честно положени в нем быша многоцелебнии мощи ваша, святии мученицы Флоре и Лавре, от них же мнози цельбу чудну приимше, благодарно пояху Богу: Аллилуиа.

Икос 11

Светом невещественным облистаеми, в селениях святых водворяеми и радости неизреченныя исполняеми, ликуете ныне со Ангелы светло, мученицы Господни, осветите и нас, мраком суетствий покрываемых, злобою мира сего озобляемых и едину токмо отраду имущих, еже к вам прибегати и сице вы воспевати: Радуйтесь, мглу прелести разгнавшии; радуйтесь, безбожия ночь осветившии. Радуйтесь, ненавидением неправедным возненавиденнии на земли; радуйтесь, в радость Господа вшедшии на небеси. Радуйтесь, скорбьми многими живот вечный наследствовавшии; радуйтесь, в скорбех и теснотах сущим утешение от Духа Свята просящии. Радуйтесь, звезды, блистания терпения испускающия; радуйтесь, светила, верных души просвещающия. Радуйтесь, Флоре и Лавре, рая Христова цветы прекраснии.

Кондак 12

Благодать велика дана есть от Вышняго вам, доблии страдальцы, яко пришедшим от скорби великия и окропившим в крови Агнчей ризы своя; сего ради со всеми святыми Престолу Божию предстоите, выну зовуще: Аллилуиа.

Икос 12

Поюще вы во храме вашем, хвалим вас, Флоре и Лавре, яко благочестия мученики, в трудех от юности пребывшия, веру в Троицу Нераздельную соблюдшия и ко Христу победно отшедшия, Ему же ныне предстояще, не забудите зовущих к вам сице: Радуйтесь, Царя Небеснаго воины изряднии; радуйтесь, венцы победными добре венчаннии. Радуйтесь, камение многоценное в сокровищах Владыки Небеснаго; радуйтесь, богатство неизживаемое Церкви, на земли воинствующия. Радуйтесь, зодчии, храм Духа Божественнаго в себе самех явившии; радуйтесь, здатели, на недвижимем камени веры души многих утвердившии. Радуйтесь, блистанием небесным ныне осияваемии; радуйтесь, сумрак мыслей тяжких от нас прогоняющии. Радуйтесь, Флоре и Лавре, рая Христова цветы прекраснии.

Кондак 13

О преславная мученик двоице Флоре и Лавре, самобратное единение, Троице Святей честное похваление! Нынешнее приимши наше пение, молитесь Господа за ны, да избавит нас от всяких бед и скорбей, даровав же нам до конца пребывание во Святей Церкви Своей, да сподобит по кончине и последнем Суде с вами и со всеми святыми воспевати Богу: Аллилуиа, Аллилуиа, Аллилуиа.

(Этот кондак читается трижды, затем икос 1 и кондак 1)